



Demokratska Narodna Zajednica
Bosne i Hercegovine

PROGRAMSKA PLATFORMA
ZA IZBORE 03. OKTOBRA 2010. GODINE

UNSKO-SANSKI KANTON
(EVROPSKA KAPIJA BiH)



Vrijeme je ...

Građani Unsko-sanskog kantona, ponosne Krajiškinje i Krajišnici,

Živimo u vremenu kada naš USK, naša Krajina bilježi jednu od najtužnijih i najsumornijih stranica u svojoj povijesti.

Teško da može proći dan u kojem se većina Krajišnika danas ne suočava sa nekim od obilježja naše današnje stvarnosti u kojoj su nezaposleni, poniženi, osiromašeni, opljačkani, zapostavljeni, nezaštićeni, izolirani i često obespravljeni.

Više od šamara boli činjenica da se naša Krajina od viših nivoa vlasti godinama mjeri dvostrukim aršinima po kojima smo prvi i imamo prednost kada treba porez, vojnik ili glas, a potpuno nas zaborave kada treba ulagati i unapređivati zdravstvo, školstvo, infrastrukturu, privredu ili neki drugi vitalni segment u Krajini.

Nema nikakve dileme, odgovorni za ovakvo stanje u Krajini i za ovakav ponižavajući tretman prema Krajini i Krajišnicima su naši poslijeratni vladari koji su osiromašili i ekonomski uništili Krajinu i naši izabrani predstavnici u višim nivoima vlasti koji su godinama nijemo promatrali ponižavanje i zapostavljanje Krajine u svim segmentima života.

Znamo da dijelimo mišljenje većine Vas u ocjeni stanja i uzročnicima stanja u Krajini, ali redovno to sami sebi ne želimo priznati i onda nije ni čudno što, iz izbora u izbore, ponavljamo iste greške, vjerujemo onima koji nas godinama na isti način lažu i obmanjuju i biramo one koji nas godinama siromaše, sramote i ponižavaju.

Vrijeme je da povjerujemo svojim očima i da 03. oktobra okrenemo ploču, da uskratimo povjerenje i pravo bilo kome da nas siromaši, sramoti i ponižava i da budućnost naše djece čini neizvjesnom.

Demokratska Narodna Zajednica BiH je Vaš dobri znanac na političkoj sceni USK-a, o kojem ste imali ili imate pozitivan ili negativan stav, ali prema kojem niste i ne možete biti ravnodušni.

U nekoliko proteklih godina, uvjerali ste se da i sa malo političkog uticaja DNZ BiH može puno doprinosti političkoj stabilizaciji USK i svjedoci ste sa koliko odgovornosti prema USK-u i građanima DNZ BiH pristupa u kriznim trenucima po funkcioniranje vitalnih funkcija u USK-u.

DNZ BiH je danas zrela, ozbiljna i odgovorna politička snaga, dokazani borac za interese Krajine i Krajišnika, ima programe i viziju budućnosti Krajine, ima znanja, volje i hrabrosti da zajedno sa drugim naprednim snagama i zajedno sa Vama vrati izgubljeno dostojanstvo i nadu Krajini i svim Krajišnicima.

Vrijeme je da naš USK, našu Krajinu, sutrašnju Bihaćku regiju, nakon Izбора, zajedno gradimo kao zapadnu kapiju Evropske BiH. DNZ BiH je spremna da zajedno sa Vama vrati dostojanstvo Krajini i preuzme odgovornost za njenu budućnost i budućnost svih njenih građana.

Vrijeme je da Krajina i Krajišnici prodišu punim plućima i da se opet čuju zvuci iz fabrika od rada strojeva, a ne od rada onih koji ih pljačkaju, demoliraju i pretvaraju u staro željezo.

Napravite 03. oktobra hrabar i odlučan korak jer **Vrijeme je...**



**Kandidat DNZ BiH za bošnjačkog člana
Predsjedništva Bosne i Hercegovine**



mr. Đedović Ibrahim

magistar vojno-organizacionih nauka
Rođen 26.10.1961. godine u Kikačima,
općina Kalesija.
Predsjednik Glavnog odbora DNZ BiH
i član Predsjedništva DNZ BiH.
Privatni poduzetnik, zaposlen u preduzeću
Ben-Mal Group Velika Kladuša.
Oženjen, otac dvoje djece.

**Lista kandidata za Zastupnički/Predstavnički dom
Parlamentarne skupštine BiH,
izborna jedinica 1 USK i Kanton 10**



1. Purić Nermin, diplomirani ekonomista,

Rođen 15.05.1981. godine u Ljubljani.
Portparol DNZ BiH i
član Predsjedništva DNZ BiH.
Zaposlen u Parlamentu Federacije BiH.
Oženjen, otac jednog djeteta.



2. Došenović Vera, ekonomista

Rođena 15.10.1952. godine
u Donjem Lapcu, RH.
Udata, majka dvoje djece.

3. Huskić Safet, diplomirani pravnik

Rođen 21.07.1981. godine u Cazinu.
Nezaposlen.
Neoženjen.



4. Pajzetović Almir

diplomirani ekonomista

Rođen 17.08.1976. godine u Bihaću.
Zaposlen kao direktor u JKUP
„Komunalije“ Velika Kladuša.
Oženjen, otac dvoje djece.



5. Keserović Emina-Minka

ekonomista

Rođena 12.10.1947. godine
u Todorovu, općina Velika Kladuša.
Udata, majka troje djece.



6. Došen Milenko

apsolvent

Rođen 25.02.1965. godine u
Bosanskom Petrovcu.
Nezaposlen.
Neoženjen.



7. Durmić Jasmin,

diplomirani ekonomista

Rođen 10.06.1979. godine
u Velikoj Kladuši.
Zaposlen u JKP „VIK“ u Velikoj Kladuši.
Oženjen.



8. Kekić Nura

diplomirani pravnik

Rođena 21.11.1985. godine
u Velikoj Kladuši.
Zaposlena kao pripravnik.

Lista kandidata za Zastupnički/Predstavnički dom
Parlamenta Federacije BiH,
Izborna jedinica 1 USK



1. **Sabljaković Hafeza**
doktor medicine

Rođena 22.03.1963. godine u Cazinu.
Potpredsjednica DNZ BiH.
Zaposlena u Parlamentu Federacije BiH.
Udata, majka dvoje djece.



2. **Keserović Kenan**
diplomirani ekonomista, student završne
godine na pravnom fakultetu
Rođen 27.01.1981. godine u Karlovcu.
Potpredsjednik DNZ BiH.
Zaposlen u Parlamentu Federacije BiH.
Oženjen.



3. **Čaušević Osman**
diplomirani inženjer mašinstva
Rođen 13.05.1963. godine
u Todorovu, općina Velika Kladuša.
Zaposlen kao direktor
JKP „VIK“ Velika Kladuša.
Oženjen, otac jednog djeteta.



4. **Kovačević Slavica**
ekonomski tehničar
Rođena 10.01.1962. godine
u Donjoj Suvaji, općina Bosanska Krupa.
Nezaposlena.
Udata, majka dvoje djece.



5. **Keškić Ekrem-Učo**
diplomirani učitelj
Rođen 19.04.1957. godine,
Mala Peć, općina Bihać.
Zaposlen u OŠ „Kamenica“ u Bihaću.
Oženjen, otac troje djece.



6. **Murtić Ervin**
apsolvent ekonomije
Rođen 10.02.1976. godine
u D. Slapnici, općina Velika Kladuša.
Nezaposlen.
Oženjen, otac jednog djeteta.



7. **Muhamedagić Hašija**
prosvjetni radnik
Rođena 21.03.1947. godine
u Kulen Vakufu, općina Bihać.
Zaposlena u Prvoj osnovnoj školi
u Velikoj Kladuši.
Udata, majka dvoje djece.



8. **Miljević Miloš**
penzioner
Rođen 05.07.1949 u Jelašinovci,
općina Sanski Most.
Oženjen, otac dvoje djece.



9. **Samardžić Adis**
diplomirani ekonomista
Rođen 18.05.1983. godine u Bihaću.
Zaposlen u Saniteks d.d.
u Velikoj Kladuši.
Neoženjen.



10. Kudužović Sadina
diplomirani ekonomista

Rođena 15.02.1983. godine
u Velikoj Kladuši.
Nezaposlena.
Neudata.



11. Ćerimović Muharem
VK mašinac

Rođen 22.11.1955. godine u Maloj Kladuši.
Zaposlen u Finab d.o.o. u Velikoj Kladuši.
Oženjen, otac troje djece.



12. Nuhanović Selvedina
SSS

Rođena 16.07.1985. godine
u Velikoj Kladuši.
Nezaposlena.
Neudata.



13. Silajdžić Huse
SSS

rođen 30.03.1954. godine
u Režzovićima, općina Ključ.
Oženjen, otac petero djece.



14. Oručević Zlatko
diplomirani inženjer kemijske tehnologije

Rođen 20.12.1960. godine u Vrnograču,
općina Velika Kladuša.
Zaposlen u Saniteks d.d Velika Kladuša.
Oženjen, otac dvoje djece.

Lista kandidata za Skupštinu Unsko-sanskog katona



1. Mulalić Admil-Ado
VŠS

Rođen 09.07.1965. godine
u Crvarevcu, općina Velika Kladuša.
Član Predsjedništva DNZ BiH.
Zaposlen kao Načelnik
općine Velika Kladuša.
Oženjen, otac troje djece.



2. Abdić-Jelenović Elvira-Ljilja,
diplomirani inženjer građevine

Rođena 07.09.1969. godine u Karlovcu.
Član Predsjedništva DNZ BiH.
Zaposlena u Finab d.o.o. Velika Kladuša.
Udata, majka dvoje djece.



3. Prof.dr. Škrgić Muhamed,

doktor društveno humanističkih nauka
Rođen 08.06.1946. godine
u Krakači, općina Cazin.
Potpredsjednik DNZ BiH.
Zaposlen u Skupštini USK-a.
Razveden, otac troje djece.



4. Knežević Miodrag
doktor medicine

Rođen 11.05.1960 godine u Bosanskoj Krupi.
Zaposlen u Domu zdravlja Velika Kladuša.
Oženjen, otac dvoje djece.



5. Makić Amela

diplomirani edukator-rehabilitator
Rođena 20.04.1984. godine u Bos. Krupi.
Zaposlena u JU „Centar za socijalni rad“
Velika Kladuša.
Udata.



- 6. Žutić Elmer**
prim. dr. ginekolog
Rođen 01.12.1965. godine u Bihaću.
Zaposlen u KB „dr. Irfan Ljubijankić“
u Bihaću.
Oženjen, otac dvoje djece.



- 7. Grbić Branko**
inženjer građevine
Rođen 25.09.1957. godine u B. Petrovcu.
Privatni poduzetnik.
Oženjen, otac jednog djeteta.



- 8. Huskić Edina**
apsolvent prava
Rođena 29.11.1984. godine u Cazinu.
Zaposlena u Skupštini USK-a.
Neudata.



- 9. Dizdarević Enver**
SSS
Rođen 20.09.1960. godine
u Mrazovcu, općina Bužim.
Privatni poduzetnik.
Oženjen, otac dvoje djece.



- 10. Aličević Husein**
VKV elektromehaničar
Rođen 17.06.1955. godine
u Bosanskom Novom.
Nezaposlen.
Razveden, otac četvero djece.



- 11. Alibegić Aida**
apsolvent razredne nastave
Rođena 18.11.1987. godine
u Velikoj Kladuši.
Nezaposlena.
Neudata.



- 12. Kadić Izet**
VSS
Rođen 10.06.1940. godine
u Bišćanima, općina Sanski Most.
Penzioner.
Oženjen, otac petero djece.



- 13. Beganović Mirvet**
diplomirani inženjer preh. inženjerstva
Rođen 11.02.1965. godine u Donjoj Lučkoj,
općina Cazin. Član Predsjedništva DNZ BiH.
Zaposlen u organu uprave Velika Kladuša na
poziciji savjetnika Općinskog načelnika.
Oženjen, otac dvoje djece.



- 14. Kajtazović Elvedina**
diplomirani inženjer poljoprivrede
Rođena 21.04.1983. godine
u Velikoj Kladuši.
Nezaposlena.
Neudata.



- 15. Dolić Ismet**
diplomirani ekonomista
Rođen 22.04.1967. godine
u Donjoj Vidovskoj, općina Velika Kladuša.
Zaposlen u “KIB banka“, Velika Kladuša.
Oženjen, otac dvoje djece.



- 16. Nadarević Hasnija**
tekstilni tehničar
Rođena 13.08.1962. godine
u Bosanskom Petrovcu.
Privatna poduzetnica.
Udata, majka jednog djeteta.



- 17. Kendić Mevludin**
diplomirani ekonomista
Rođen 29.01.1981. godine u Ljubljani.
Zaposlen u Saniteks d.d. u V. Kladuši.
Oženjen.



18. Keranović Edina

profesorica njemačkog jezika
Rođena 18.06.1982. godine u Bihaću.
Zaposlena u „Špedicija AE-Hermes“ d.o.o.
u Cazinu.
Neudata.



19. Beganović Hakija

prosvjetni radnik
Rođen 22.01.1947. godine u Cazinu
Zaposlen u Skupštini USK-a.
Oženjen, otac dvoje djece.



20. Bašić Fikret

nastavnik engleskog jezika i književnosti
Rođen 15.03.1973. godine u Bihaću.
Zaposlen u JU OŠ „Fadil Bilal“ u Šumatcu.
Neoženjen.



21. Saračević Salko

diplomirani inženjer tehnologije
Rođen 10.10.1944. godine u Bihaću.
Penzioner.
Oženjen, otac dvoje djece.



22. Alibegić Veldina

profesor njemačkog jezika
Rođena 28.09.1983. godine u Bihaću.
Nezaposlena.
Neudata.



23. Tralješić Zaim

ekonomista
Rođen 03.03.1981. godine
u Dolovima, općina Velika Kladuša.
Zaposlen u „A.D.S.I. Montaža“ d.o.o.
u Vrnograču.
Oženjen, otac jednog djeteta.



24. Muratović Nihad

student ekonomije
Rođen 18.02.1991. godine
u Bosanskoj Krupi.
Nezaposlen.
Neoženjen.



25. Čović Esad-Čova

diplomirani ekonomista
Rođen 11.05.1957. godine
u Šturliću, općina Cazin.
Zaposlen u DNZ BiH.
Oženjen, otac jednog djeteta.



26. Rizvić Adnana

medicinski tehničar
Rođena 05.06.1989. godine u Bihaću.
Zaposlena u „Tuš trade“ Velika Kladuša.
Neudata.



27. Kadić Mersida

inženjer organizacije i menadžmenta
Rođena 20.06.1964. godine u Zenici.
Nezaposlena.
Udata, majka dvoje djece.



28. Gabeljić Elvir

diplomirani ekonomista
Rođen 11.12.1982. godine u Vlasenici.
Nezaposlen.
Neoženjen.



29. Ferizović Hajrudin-Rudi

mašinski inženjer
Rođen 01.01.1937. godine
u Bosanskom Petrovcu.
Penzioner.
Oženjen, otac dvoje djece.



- 30. Novaković Mile**
penzioner
Rođen 14.10.1947. godine
u Sanskom Mostu.
Oženjen, otac troje djece.



- 31. Mašinović Zumret**
SSS
Rođen 15.04.1959. godine
u Crvarevcu, općina Velika Kladuša.
Zaposlen u „Library“ d.o.o. Velika Kladuša.
Oženjen, otac dvoje djece.



- 32. Ćerimović Aida**
diplomirani ekonomista
Rođena 28.08.1981. godine u Velikoj Kladuši.
Zaposlena kao pripravnik u
organu uprave Velika Kladuša.
Neudata.



- 33. Elezović Nurija**
ekonomski tehničar
Rođen 25.12.1961. godine
u Vrnograču, općina Velika Kladuša.
Nezaposlen.
Oženjen, otac dvoje djece.




Unsko-sanski kanton se nalazi na krajnjem sjeverozapadu BiH, prostire se na površini od 4.125 km², na kojoj (po procjenama) trenutno živi 287.114 stanovnika.

Broj odsutnog stanovništva iz kantona, po zvaničnim publikacijama, u Federaciji BiH (Federalni zavod za programiranje razvoja) iznosi 56.413, što za USK i nije pouzdan podatak i nezvanično je iz USK-a odsutno više od 80.000 stanovnika.

Rendgen-slika USK-a za 2009. godinu, sa osnovnim pokazateljima, izgleda ovako:

UNSKO-SANSKI KANTON



Pozicioniran kao zapadna kapija BiH u Evropu i svijet, suočen sa činjenicom da će već od 2011. godine graničiti sa EU u dužini blizu 300 km, obdaren prirodnim ljepotama, ljudskim resursima, stvaralačkim i radnim navikama stanovništva Unsko-sanski kanton ima sve predispozicije da živi bolje i prednjači u F BiH, pa i BiH po svim relevantnim parametrima.

Ali.....

Ali, pod vodstvom neodgovorne, nesposobne i kriminogene vlasti, Unsko-sanski kanton je od najperspektivnijeg kantona u Federaciji pretvoren u kanton koji je po svim relevantnim i mjerljivim parametrima ekonomskog razvoja pozicioniran na začelju ili blizu začelja.

Jasno napominjemo da ovo nije rezultat raspoloživih potencijala i resursa, već isključivo rezultat neodgovornosti i nesposobnosti poslijeratne vlasti u USK-u.

Prema metodologiji i kriterijima koje primjenjuje Federalni zavod za programiranje razvoja, rang-lista razvijenosti kantona u odnosu na Federaciju izgleda ovako:

NIVO RAZVIJENOSTI FEDERACIJE BIH PO KANTONIMA U 2009. GOD.

Općine	Stepen zaposlen. u %	Stepen nezaposlen. u %	Broj učenika /osn+sred/ na 1000 stanovnika	GDP po glavi stan. u KM	Indeks odsut. stanov.
1	2	3	4	5	6
SAK	28,2	35,7	133	12.371	-14,1
ZHK	17,5	39,0	174	5.419	-8,2
HNK	18,6	41,3	140	7.095	-15,6
TK	16,4	52,2	140	4.791	-4,9
ZDK	17,7	48,1	145	5.754	-16,4
BPK	14,8	46,4	113	6.186	-20,1
USK	11,4	54,2	142	4.142	-16,4
SBK	14,6	50,1	155	4.579	-24,8
K - 10	12,1	46,4	112	4.842	-30,3
POK	13,0	52,4	131	5.703	-37,3
Federacija BiH	18,3	45,4	141	6.516	-15,6

Kao što se vidi, prema zbirnom indexu pet osnovnih parametara razvijenosti u Federaciji (stepen zaposlenosti, stepen nezaposlenosti, broj učenika na 1.000 stanovnika, GDP po stanovniku i odsutno stanovništvo), USK je rangiran na sedmom mjestu u Federaciji, a po istoj metodologiji dvije općine iz USK-a (Bosanski Petrovac i Ključ) svrstane su u izrazito nerazvijene, a tri općine (Bužim, Bosanska Krupa i Sanski Most) u nedovoljno razvijene općine u F BiH, tri općine (Bihać, Cazin i Velika Kladuša) svrstane su u srednje razvijene općine i niti jedna općina iz USK-a nije među razvijenim općinama u Federaciji BiH.

Suočen sa ovakvim činjenicama, potresan čestim krizama i smjenama vlasti, Unsko-sanski kanton se sve više bavi sam sa sobom, a zalaganje za ekonomiju, privredu, biznis i napredak, ostaje samo u sferi deklarativnog. To najbolje potkrepljuju podaci o broju registrovanih privrednih subjekata po kantonima na dan 31.12.2009. godine, po kojima je USK sa samo 39 preduzeća na 1.000 stanovnika na posljednjem mjestu u Federaciji, podaci o stepenu nezaposlenosti sa 54,2% po kojima je USK ubjedljivo na prvom mjestu u Federaciji ili sa stepenom zaposlenosti od svega 11,4% USK je ubjedljivo posljednji, što je recimo za 2,5 puta manje od Sarajevskog kantona.

Federacija BiH = 100					Indeks razvijenosti	Rang
Stepen zaposlen.	Stepen nezaposlen.	Broj učenika na 1000 stanovnika	GDP/ po glavi stan.	Odsutnost stanov.		
7	8	9	10	11	12	13
153,9	121,4	94,4	189,9	109,3	133,8	1
95,6	114,1	123,5	83,2	147,5	112,8	2
101,5	109,0	99,5	108,9	100,1	103,8	3
89,6	85,1	99,3	73,5	168,4	103,2	4
96,6	94,1	102,5	88,3	94,6	95,2	5
80,7	97,9	80,0	94,9	71,0	84,9	6
62,1	80,5	100,4	63,6	95,0	80,3	7
79,8	89,7	109,5	70,3	41,2	78,1	8
65,9	97,8	79,1	74,3	5,5	64,5	9
70,7	84,6	93,0	87,5	-39,2	59,3	10
100,0	100,0	100,0	100,0	100,0	100,0	

Alarmanantna je i poražavajuća činjenica da je USK sa 4.100 KM GDP po glavi stanovnika posljednji u Federaciji BiH, a to je tri puta manje nego u Kantonu Sarajevo.

Podaci o investicijama po stanovniku u 2009. godini daju tragičnu sliku stanja i perspektive USK-a. Po podacima Federalnog zavoda za programiranje razvoja, investicije po stanovniku za 2009. godinu u USK-u iznosile su 491 KM, što je najmanje u Federaciji, a u isto vrijeme u Tuzlanskom kantonu je to 980 KM, u Posavskom kantonu 820 KM, u Livanjskom 670 KM, a u Sarajevskom kantonu 2.550 KM, ili preko pet puta više nego u USK-u.

Razlozi ovakvog stanja (ne) poduzetnosti su višestruki, a posljedice katastrofalne po ekonomiju i građane USK-a.

I viši nivoi vlasti su naše bavljenje sobom zlo(upotrijebili) za zadovo ljevanje sopstvenih interesa i gotovo potpuno ignorisanje, ili sveli na samo nužno zadovoljavanje interesa ovoga naroda i kraja.

Za ilustraciju ove tvrdnje dovoljna su samo dva pokazatelja:

- a) **Iako Unsko-sanski kanton čini 15,8% površine i 13,1% stanovništva Federacije BiH, od rata do danas je na Unsko-sanski kanton usmjereno tek 3,5% budžetskih grantova, donatorskih i kreditnih sredstava međunarodne zajednice u Federaciji BiH.**
- b) **Unsko-sanski kanton prednjači u F BiH izgrađenim lokalnim putevima od rata do danas. Ali, to je rezultat samoorganiziranja građana i lokalnih zajednica, odnosno općina, sa znatnim direktnim učešćem stanovništva u sufinansiranju tih puteva, često u procentima i preko 50%.**

Na drugoj strani imamo činjenicu projekcije novih puteva višeg ranga, **autoputevi, magistralni i regionalni putevi potpuno zaobilaze USK**, a postojeći magistralni i regionalni putevi u USK-u često puta više liče na makadam ili „zakrpane hlače“, negoli na više rangirani put.

O brzim cestama, ili auto-cesti kroz Unsko-sanski kanton, kao da se ne smije ni govoriti ili se govori samo u svrhu novih obmana Krajišnika u svrhu pridobivanja njihove političke podrške.

Zašto.....???

Zašto? Pogotovo ako se zna da bez savremenih cesta nema elementarne osnove za razvoj biznisa i za napredak zajednice, bilo koje, pa

ni USK-a.

Uzmimo primjer općine Dugo Polje kod Splita, u susjednoj Hrvatskoj, do prije nekoliko godina samo krš, a prolaskom auto-cesta i pametnom politikom lokalne zajednice stasale su brojne poslovne zone, a Dugo Polje postaje jedna od najrazvijenijih općina u Republici Hrvatskoj.

U suočavanju sa ovim poraznim činjenicama, politički predstavnici USK-a moraju postići konsenzus oko stavljanja ovog pitanja na dnevni red višim nivoima vlasti kojima je vrijeme reći: „Nemojte nam više pričati o ljepotama i značaju Krajine, pokažite to djelom, tj. ulaganjem javnog novca u naš kanton, bar u granicama koliko to ovom kantonu realno pripada. Političko nejedinstvo i ustupanje razuma pred emocijama i ličnim interesima, od 1996. godine do danas su nanijeli nemjerljive ekonomske štete Unsko-sanskom kantonu i svim njegovim čestitim građanima, sa brojnim i multipleksnim posljedicama.

Politički inat, nesposobnost i kriminogeni motivi nesumnjivo su uništili Agrokomerc, gigant bivše države i firmu koja je dragulj Krajine i koja može hraniti cijelu BiH i znatno više.

Umjesto nosioca i motora novog razvoja i napretka USK-a i šire, Agrokomerc je danas pravi spomenik pljački i uništavanju ekonomskih potencijala i resursa ovoga kraja pod pokroviteljstvom poslijeratne vlasti u USK-u i Federaciji BiH. Presuda Doma za ljudska prava po tužbi nezaposlenih i obespravljenih dioničara do danas je ostala mrtvo slovo na papiru i dodatni poticaj za sistematsko uništavanje Agrokomerca.

Sličnu sudbinu, sa nešto drugačijim motivima, doživjeli su i drugi nosioci razvoja ovoga kraja: Kombiteks, Žitoprerađa, Medic, Šipad, Polietilenka.....

Političko nerazumijevanje i opstrukcije, prvenstveno političkih predstavnika USK-a i poslijeratne vlasti, prouzrokovali su neizvršavanje Presude Ustavnog suda BiH u slučaju prava stradalnika rata i njihovih porodica iz reda Narodne Odbrane, čime USK godišnje gubi oko 5 mil. KM finansijskog potencijala koji bi bio značajna injekcija ekonomskoj i socijalnoj politici i uz to se prema ovim kategorijama i danas krše elementarna ljudska prava.

Zdravstvo karakterizira činjenica da na jednog ljekara dolazi 1.048 stanovnika, na stomatologa 8.003 stanovnika, a na jednu bolničku postelju dolazi 360 stanovnika.

Pored toga, javna je tajna da je zdravstveni sektor USK u veoma lošem organizacionom, tehničkom, stručnom i finansijskom stanju.

Katastrofalno su loši uslovi osiguranja i liječenja pacijenata, veliki broj uopće neosiguranih (oko 30%), zastarjelost medicinske opreme, neopremljenost i neosposobljenost kadra za vrhunske medicinske usluge, na jednoj, te ogromna udaljenost i katastrofalni putevi do Sarajeva, na drugoj strani, su činjenice koje sve nas moraju duboko zabrinuti.

Ne samo da se ne možemo liječiti ni blizu kao stanovnici Sarajeva, Tuzle, na primjer, već navedene činjenice mnogi, nažalost, plaćaju i najvrednijim što čovjek ima – svojim životom.

Zbog toga, stanovnici USK-a čitav svoj radni vijek plaćaju doprinose za svoje liječenje na jednu stranu, a čim se ozbiljnije razbole moraju ponovo plaćati drugu stranu, obično zdravstvenim ustanovama u Republici Hrvatskoj, Sloveniji, ali i privatnim klinikama u BiH.

Oni uvijek imaju vremena, znaju i mogu, a većina onih koje plaćamo godinama, postupaju potpuno suprotno, što predstavlja poseban – subjektivan problem zdravstva USK-a.

Uz sve ovo, korupcija u zdravstvu je uzela toliko maha da se davanje mita ljekarima i zdravstvenim radnicima smatra stilom života i sve je više to uslov za profesionalniji odnos medicinskih radnika prema pacijentima.

Obrazovanje Unsko-sanskog kantona „boluje“ od približno istih bolesti, kao i zdravstvo, naravno sa svojim specifičnostima.

Još uvijek mnoge osnovne i srednje škole nemaju ni elementarne uvjete za odvijanje nastave. Prokišnjavaju krovovi, učionice pune vlage, zapušteni i neispravni sanitarni čvorovi, nedostatak osnovnih energenata za grijanje, nedostatak nastavnih pomagala... i to u istoj FBiH gdje, recimo, u Sarajevu mnoge škole imaju potpuno kompjuteriziranu nastavu i video nadzor.

Kao da ne živimo u istoj državi i ne izdvajamo iste iznose za obrazovanje naše mladosti i kao da sva djeca u državi ili entitetu nisu jednako vrijedna i ne zaslužuju jednako kvalitetno obrazovanje.

Visoko obrazovanje u USK-u, pored objektivnih, „bolesti odrastanja“, opterećeno je odsustvom društvene podrške, inflacijom akademskih zvanja nastavnog kadra stečenih na zamagljen način, devalviranjem kvaliteta nastavnog procesa, političkim previranjima u visokoškolskim ustanovama, nedostatkom elementarnih uslova za rad i obavljanje nastave, produkcijom nekvalitetnog i tržištu radne snage nepotrebnog kadra i dr.

Korupcija i kriminal su stekli stanarsko pravo u visokoškolskim ustanovama i proizveli prosvjetnu mafiju po izoru na mnoge druge segmente života.

Sve ovo uveliko dovodi u pitanje ispunjavanje uslova za certificiranje Univerziteta na ispunjavanje uslova za nastavak Bolonjskog procesa. Posljedica toga, na jednoj, i činjenice, na drugoj strani, je sve veći broj visoko obrazovanih kadrova na biroima za zapošljavanje.

Krajem 2009. godine, Unsko-sanski kanton je imao 794 nezaposlena sa VSS i 645 sa VŠS.

U uslovima daljnjeg usporavanja ekonomskih aktivnosti, Unsko-sanski kanton će uskoro biti suočen sa hiperprodukcijom mladih i visokoobrazovanih kadrova, a posljedice njihove pretežne usmjerenosti na biroa za zapošljavanje su katastrofalne, brojne i nesagledive.

Socijalna sigurnost jednog velikog dijela građana koji žive na granici siromaštva je potpuno neizvjesna, jer su socijalne prinadležnosti u uslovima rekordne nezaposlenosti i kriznih efekata nedostatne sa tendencijom daljnjeg reduciranja u odnosu na gotovo sve druge kantone. U posebno teškom su položaju penzioneri, nemoćna lica, nezaposleni, kao i zaposleni koji ne primaju svoje zarađene plaće, a svi su prepušteni potpunoj agoniji i čekanju.

Unsko-sanski kanton je potpunu socijalnu katastrofu, do sada izbjegavao samo zahvaljujući doznakama i nesebičnoj pomoći naših ljudi iz dijaspore. Takvih je na (ne)sreću sa prostora USK-a oko 50.000 razasutih širom Evrope, SAD, Australije..., a njih još oko 20.000 prima penzije zaslužene u inostranstvu.

Unatoč donesenim zakonima iz domena državne uprave, državnih aparat i javna uprava u USK-u su i dalje glomazni, neracionalni i nefunkcionalni, a u zapošljavanju, umjesto struke i zakona, i dalje

vladaju zakoni nepotizma i političke podobnosti.

Iako, geostrateški, zauzima položaj kapije BiH u Evropu i svijet, USK sve više postaje slijepo crijevo i predmet komunikacijskog zaobilaženja od bilo kakvih kombinacija za izgradnju prometnih i infrastrukturnih koridora kroz BiH, prema zapadu i istoku Evrope i unutar vlastite države. Saobraćajnice u USK-u i prema ostalim dijelovima BiH su preopterećene, oštećene i potpuno zapuštene, tako da je putovanje njima pravi rulet i puno opasnosti po živote vozača, putnika i pješaka.

Stanje ljudskih prava u USK-u je još vrlo teško i građani su svakodnevno izloženi raznim oblicima diskriminacije i uskraćivanja elementarnih ljudskih prava i sloboda.

Najveći prekršitelji ljudskih prava su državni organi i javni sektor, a najveći uzročnici su sporo i neefikasno pravosuđe i veliko prisustvo korupcije i političkog uticaja.

Politička situacija u USK-u posljednjih godina značajno je stabilizirana u odnosu na ranije periode, ali i dalje se stanje reguliše na „daljinski upravljач“ i po potrebi se iz političkih centara moći „pali vatra“ i šalju „piromani“ koji svojim nastupima podižu tenzije i tako zaustavljaju i vraćaju korak nazad procese pomirenja i normalizacije odnosa u Krajini.

Redovno se tenzije podižu pred izbore u cilju nove homogenizacije birača i dobivanja podrške birača na konvencionalno populistički način.



DNZ BiH je, uz sve nametnute hipoteke iz prošlosti, dala značajan doprinos stabilizaciji političkog stanja u USK-u i pokazala da sa malo političkog uticaja može biti snažan korektor i amortizer vlasti. U kriznim političkim momentima, DNZ BiH je vodila racionalnu politiku i štitila interese kantona i njegovih građana i u prethodnom mandatu je jedino Klub poslanika DNZ BiH završio mandat kompletan i bez unutrašnjih trzavica.

U odnosima na relaciji USK – viši nivoi vlasti nema nikakvih promjena u odnosu na ranije periode. Viši nivoi vlasti sada još perfidnije ignorišu interese USK-a, a politički predstavnici stranaka u vlasti iz USK-a prema takvim postupcima iskazuju potpunu političku anemiju.

Podatak da u Vladi Federacije BiH u proteklom četverogodišnjem mandatu nije bilo niti jednog ministra ili zamjenika ministra iz USK dovoljno govore o tom odnosu.

U proteklom vremenu nije bilo značajnijih aktivnosti oko priprema za regionalizaciju BiH, koja će biti aktuelna odmah poslije izbora u BiH.

Unatoč teretu nametnute hipoteke, DNZ BiH se u ovome teškom vremenu profilirala u principijelnu, zrelu i respektabilnu političku snagu koja je spremna da, zajedno sa ostalim naprednim demokratskim snagama u USK-u, formira odgovornu vlast i vrati dostojanstvo USK-u i njegovim građanima.

Ako bismo davali sažetu sliku USK-a danas, 15 godina nakon rata i isto toliko vladavine jedne vlasti, onda se, nažalost, ne mogu izbjeći činjenice da su građani USK danas nezaposleni, poniženi, osiromašeni, opljačkani, obespravljani, politički podijeljeni, zdravstveno i socijalno nesigurni i pretvoreni u taoce jedne neodgovorne, nesposobne i kriminogene vlasti koja je suvereno gospodarila USK-om punih 15 poslijeratnih godina.

Pred građanima USK-a **03. oktobra 2010.** godine je jedan veliki izazov i veliki ispit koji traži odgovor na pitanje: Može li ovako i kako dalje?

Vrijeme je da građani USK-a sami odgovore na ovo pitanje i kakav god bio njihov odgovor DNZ BiH kao odgovorna politička stranka će isti respektovati i uvažavati.

Unsko-sanski kanton, od kraja rata do danas, kao da se maksimalno trudio da izgradi što lošiji imidž, kako u višim nivoima vlasti, tako i u očima Međunarodne zajednice i javnosti.

Najbolji primjer tog imidža je činjenica da je USK, od rata do danas, promijenilo 10 vlada i 13 premijera. U kojoj mjeri se radi o kadrovima nedoraslim vremenu vremena i (ne)svjesnih svojih obaveza i odgovornosti za traženje i pronalaženje rješenja za bolje sutra svih građana USK-a, potvrđuje činjenica da su se sve ove promjene događale unutar iste političke opcije.

Činjenica da se sve više govori o problemu opterećenja Budžeta USK-a, tužbama budžetskih korisnika i sudskim izvršenjima, takođe govori u prilog prethodnoj tvrdnji.

Radi ko šta i kako hoće, niko nije pozvan na odgovornost i odgovarao za promašaje i greške vladanja, a računi uredno, sa zateznim kamatama, stižu poniženim i osiromašenim građanima USK na plaćanje.

Hoćemo li to stanje trpjeti i naredne četiri godine zavisi samo od nas i od građana, svih zajedno i svakoga pojedinačno.

DNZ BiH u ove izbore ulazi neopterećena hipotekama obnašanja vlasti u navedenom periodu, svjesna težine trenutka i spremna, zajedno sa drugim demokratskim snagama, preuzeti breme odgovornosti i povesti građane USK-a u bolje, stabilnije i sretnije razdoblje.

Mi moramo težiti da u USK vratimo imidž rada i stvaranja i prepoznatljivosti po proizvodima, uslugama, prirodnim ljepotama i drugim vrijednostima prihvatljivih savremenom demokratskom poslovnom i političkom svijetu.

Upravo i isključivo iz tih razloga DNZ BiH pred Izbore 2010. godine pred sebe u USK-u postavlja transparentne pravce i prioritete djelovanja nakon izbora.

1. PRAVCI I PRIORITETI POLITIČKOG DJELOVANJA

U prvi plan i u prioritet postizbornih aktivnosti u USK-u, DNZ BiH stavlja aktivnosti i planove iz domena politike iz jednostavnog razloga što je ovaj segment u proteklom vremenu u USK-u i najviše oskrnavljen a, u suštini, upravo politički ambijent u velikoj mjeri usmjerava i diktira svako drugo djelovanje.

Vođena ovakvom logikom, DNZ BiH polazi od uvjerenja da su politička stabilnost i stvaranje stabilnog političkog ambijenta u USK-u prvi prioritet i zadatak učesnika u zakonodavnoj i izvršnoj vlasti nakon Izbora.

Kao budući učesnik u zakonodavnoj vlasti USK-a sa pozicije vodeće političke snage i političkog lidera USK-a, DNZ BiH u izbornom i post-izbor-

Na izborima postati vodeća politička snaga, samim tim i nezaobilazan faktor u donošenju svih bitnih političkih, ali i drugih strateških odluka od značaja za USK i sve njegove građane.

Direktno iz Izborne jedinice 1 (USK i Kanton 10), voljom birača, osigurati jedno mjesto u Zastupničkom domu PS BiH i dva mjesta u Zastupničkom domu Parlamenta FBiH, te još jedno mjesto u kompenzacionim mandatima za Parlament Federacije i eventualno za Parlamentarnu skupštinu BiH.

U proceduri delegiranja delegata u Dom naroda FBiH iz USK-a osigurati kandidaturu i prolazak po jednog kandidata DNZ BiH iz reda srpskog i hrvatskog naroda i iz reda ostalih.

Na izborima osvojiti 8 (osam) mandata za Skupštinu USK-a i na taj način osigurati što bolju poziciju u razgovorima nakon izbora za formiranje izvršne vlasti USK-a.

Nakon izbora, zajedno sa drugim relevantnim političkim faktorima koji prihvate Platformu DNZ BiH, formirati parlamentarnu većinu i odgovornu demokratsku vlast USK-a koja će smjer kretanja USK-a okrenuti u pozitivnom pravcu, u svim pitanjima bitnim za život i rad stanovnika USK-a.

Političkim sredstvima i kontinuiranim insistiranjem na dijalogu i zakonu obezbijediti ravnopravan tretman za USK u odnosu na druge kantone i regije u BiH u svim bitnim sferama života i vlasti u BiH.

Okupiti sve relevantne demokratske političke faktore USK-a, identifikovati i usaglasiti strateška pitanja USK-a i dogovoriti zajednički nastup svih političkih faktora prema višim nivoima vlasti i inostranstvu, kada su u pitanju strateški interesi USK-a, bez obzira na političku pripadnost.

Pokrenuti proces naučnog elaboriranja i političkog lobiranja za Bihačku regiju, kao Eko-regiju u procesu regionalizacije BiH koji će sigurno uslijediti nakon Izbora i koji se do sada obavljao iza zavjese i bez učešća relevantnih predstavnika iz Krajine. DNZ BiH podržava regionalizaciju BiH kao evropski način ustroja srednjeg nivoa vlasti i Evropske kriterije u formiranju regija ali neće nikada prihvatiti da Krajina bude bilo čiji priljepak ili kusus u podjeli interesnih zona između nacionalnih oligarhija i političkih lobija u BiH.

Istrajavati i insistirati da u donošenju zakona i propisa vodilja budu evropski standardi u svim oblastima života i rada, a posebno u donošenju zakona i propisa koji regulišu ekonomske tokove, privatizaciju, budžete i koncesije.

Koristeći otvoren dijalog, insistirati na dosljednim primjenama i provođenju svih zakonskih akata, a posebno Zakona o pravima branitelja i Presude Ustavnog suda F BiH za ravnopravno regulisanje statusa pripadnika i stradalnika rata iz reda NO.

Kontinuirano, sinhronizovano i jedinstveno djelovati da se postigne politički konsenzus i konačno riješi pitanje i status Agrokomerca, na način da se isti vrati onima kojima i pripada – njegovim radnicima, pregaocima i stvaracima i onima koji ga uz podršku zajednice mogu staviti u funkciju razvoja i napretka Krajine i šire.

Po preuzimanju vlasti, istu ustrojiti na racionalan, funkcionalan i efikasan način. Ustrajavati da nova vlast doista služi građanima, a vladaju zakoni i poslati u prošlost vladanja pojedinaca i grupa, često i kriminaliziranih.



2. PRAVCI I PRIORITETI EKONOMSKOG I RAZVOJNOG DJELOVANJA

Polazeći od geostrateškog položaja, raspoloživih resursa, prirodnih ljepota, mentaliteta ljudi i drugih bitnih parametara, USK je s pravom nosio epitet najperspektivnijeg kantona u Federaciji i zapadne kapije BiH u Evropu i svijet.

Privredna infrastruktura i potencijali USK-a su iz rata izašli pristojnog kondicionog stanja i, umjesto da su po završetku sukoba programski revitalizirani i brzo stavljeni u funkciju ekonomske obnove i napretka USK, nad njima je izvršen pravi ekonomski masakr rijetko viđen u modernom svijetu.

Primjeri uništavanja Agrokomerca, Kombiteksa, Polietilenke, Žitoprerade i drugih nosioca ekonomskog razvoja Krajine ostat će zabilježeni kao primjeri kako su združenim djelovanjem kriminalci potpomognuti kriminogenom vlašću uništili perspektivu i ekonomske potencijale jednoga kraja.

DNZ BiH smatra da su rekordna nezaposlenost, nizak nivo GDP-a, siva ekonomija, nizak nivo investicija i stranih ulaganja, visok nivo korupcije i kriminala, erozija gotovo svih raspoloživih resursa i dr. ISKLJUČIVO rezultat neodgovornosti, nesposobnosti i kriminaliziranosti poslijeratne vlasti, a nikako rezultat, viših sila na koje poslijeratne vlasti uvijek bacaju krivnju već 15 godina, a naročito je intenziviraju pred izbore.

Poslijeratna vlast USK-a u 15 godina vladavine nije uspjela napraviti održivu strategiju obnove i razvoja USK-a i utvrditi prioritete u poticanju razvoja i korištenju komparativnih prednosti sa kojima kanton raspolaže.

Punih 15 godina traju bezobzirno uništavanje i krađa Agrokomerca, Kombiteksa, Polietilenke, Medika, Žitoprerade i drugih privrednih resursa – šumskih, vodnih, ekoloških i drugih potencijala u Krajini. Poljoprivreda i proizvodnja hrane su, nesumnjivo, potencijali kantona, ali su potpuno prepušteni idejama i entuzijazmu poljoprivrednika čije pojedinačne uspjehe i rezultate višegodišnjeg rada i znoja žele pripisivati svi sebi, a u rješavanju brojnih problema u svome radu poljoprivrednici i proizvođači hrane obično su sami.

Prirodne ljepote USK-a, čije okosnice su dragulji prirode Una, Sana, Krušnica i druge, su neiskorištene i predmet su kontinuiranog sknavljenja, a u želji za bezobzirnou komercijalizacijom.

Svjesna ovih, ali i drugih brojnih činjenica i parametara koje su rezultat 15-godišnjeg djelovanja aktuelne vlasti u USK-u, DNZ BiH ima cilj potpuno promijeniti pristup u rješavanju ovoga pitanja, samim tim i promijeniti ekonomsku sliku USK-a kroz intenzivno podizanje nivoa ekonomske aktivnosti u svim segmentima razvoja, a posebno u onim oblastima u kojima USK, nesporno, ima velike komparativne prednosti u odnosu na druge kantone i regije.

Vođena tim ciljem, DNZ će svoje aktivnosti ekonomskog i razvojnog djelovanja usmjeravati u slijedećim pravcima i prioritetima:

Uraditi strategiju stabilizacije i razvoja USK-a kompatibilnu sa evropskim standardima i evropskim integracijskim tokovima.

Definisati strateške resurse, potencijale i interese USK-a i način njihovog stavljanja u funkciju ekonomskog razvoja i prosperiteta Krajine, sa svim vrijednostima i posljedicama koje razvoj donosi.

Kadrovski ojačati i redefinisati ulogu Agencije za privatizaciju USK-a, u svrhu kvalitetne kontrole dosadašnje privatizacije i partnerskog djelovanja Vlade i Agencije u nastavku privatizacije i zaštiti preostale državne imovine, uvažavajući interese radnika i šire zajednice.

Preuzeti odgovornost i postići konsenzus sa političkim subjektima USK-a i višim nivoima vlasti o značaju i načinu rješavanja statusa Agrokomerca i njegovog stavljanja u funkciju nosioca razvoja razvoja USK-a, koje mjesto mu, po resursima, kapacitetima i potencijalima, i pripada.

Graditi pozitivnu klimu za stvaranje i razvoj malih i srednjih preduzeća kao bitnih odrednica poduzetničkog društva, imajući u vidu da upravo ta poduzeća čine 99% svih poduzeća u Evropi i zapošljavaju oko 80% svih uposlenih.

Staviti pod javni nadzor prikupljanje i trošenje budžetskih sredstava u svim njihovim segmentima, sa ciljem ekonomičnosti, efikasnosti i socijalne osjetljivosti, te u svrhu odvajanja više sredstava za poticanje razvoja i zapošljavanja.

Stvoriti povoljniji institucionalni ambijent i mehanizme motivacije za nove investicije i strana ulaganja kao temelja oporavka i razvoja USK-a.

Aktivirati programe za oživljavanje turističkih potencijala i razvoja seoskog, sportskog, lovnog i drugih oblika savremenog turizma, za koje u USK-u postoje idealni uslovi.

Pripremiti, usvojiti i primijeniti Program ravnomjernijeg ekonomskog razvoja USK-a, odnosno svih općina u sastavu USK-a, jer je evidentna činjenica da pojedine općine (Bos. Petrovac, Bužim, Ključ i Bos. Krupa) stalno zaostaju u razvoju u odnosu na druge.

Institucionalizirati razvoj i poticaje u razvoju poljoprivrede i agrobiznisa, proizvodnju zdrave hrane i razvoj sela, kao strateški interes i komparativnu prednost USK i veliku rezervu za nova radna mjesta, a samim tim i bolji život građana uopće.

Davati doprinos i institucionalnu podršku razvoju zadrugarstva i kooperantske proizvodnje u USK-u, kao modelu organizacije poljoprivredne proizvodnje i proizvodnje zdrave hrane za vlasnike manjih poljoprivrednih posjeda i za njihovo povezivanje sa evropskim tržištem zdrave hrane.

Potpuno staviti pod javni nadzor čuvanje, eksploataciju i komercijalizaciju prirodnih bogastava USK (šume, slivovi rijeka Une i Sane, stari gradovi i dr.).

Vršiti programske pripreme i prilagođavati razvojne prioritete u pravcu da Bihaćka regija dobije status eko-regije u BiH, koja će u budućnosti sa Nacionalnim parkom Plitvice u Republici Hrvatskoj tvoriti Evropsku eko-regiju i igrati važnu ulogu u kontinentalnom i eko-turizmu i proizvodnji zdrave hrane.

Izraditi program partnerstva i uvezivanja sa našim građanima u dijaspori, u smislu stvaranja uvjeta za otvaranje i razvoj njihovog ili zajedničkih biznisa u USK-u, sa iskustvima, idejama i vrijednostima (kvalitetom) zemalja u kojima žive i rade (EU i SAD), te u tom smislu inicirati formiranje ministarstva za dijasporu i iseljenišvo na nivou države, a posebnih odjela za pitanja dijaspore na nižim nivoima vlasti.

Aktivirati rješavanje i konačno riješiti lokaciju i uređenje regionalne deponije, koje je do sada nepotrebno ispolitizirano i odlaže kvalitetno rješavanje ovoga pitanja koje je od velikog značaja za kanton.

Aktivirati i staviti u funkciju sve institucije sistema i pravne države za suzbijanje korupcije, organiziranog kriminala i sive ekonomije koje destruktivno djeluju na zdravo poduzetništvo, konkurenciju, strana ulaganja i svaki ekonomski napredak USK-a i njegovih građana.



3. PRAVCI I PRIORITETI DJELOVANJA U SEGMENTU ZDRAVSTVENE I SOCIJALNE ZAŠTITE

Zdravstvena i socijalna zaštita građana predstavljaju ogledalo ekonomskog razvoja, pravne uređenosti i humanosti neke zajednice. Sudeći po stanju u ovoj oblasti, USK je daleko od ekonomski razvijenih, pa i humanih zajednica.

USK, objektivno, nema održivu strategiju ili bilo kakav održiv program uređenja i unapređenja ove problematike, a ono programa što se s vremena na vrijeme pominje je samo mrtvo slovo na papiru koje se aktivira za političke parade ili za obnove mandata direktorima fondova i zdravstvenih ustanova.

Preventivna zdravstvena zaštita u USK-u je odavno gotovo izbrisana iz zdravstvene nomenklature.

Domovi zdravlja uglavnom preživljavaju, više brinući hoće li finansijski opstati, nego o nivou, vrstama i kvaliteti usluga koje pružaju i koje bi trebalo da pružaju građanima.

Kantonalna bolnica u Bihaću je prava slika i relevantan pokazatelj stanja i odnosa u cjelokupnom zdravstvu USK. Neprimjereni uslovi rada, zastarjelost i neispravnost medicinske opreme, neprofesionalan odnos prema korisnicima usluga, mito i korupcija, politički utjecaji, neprimjerena organizacija rada, sprega privatnog i javnog zdravstva u interesu jednog ili grupe interesno povezanih medicinskih radnika, loši međuljudski odnosi i dr. samo su neke činjenice koje odaju utisak da živimo u nekom davno prošlom vremenu, a ne da smo već prilično zakoračili u 21. vijek.

Sretnici koji imaju novac masovno koriste usluge drugih zdravstvenih centara u BiH ili u susjednim zemljama, gdje odavno imaju više ozbiljnosti i senzibiliteta prema zdravstvu i zdravstvenoj zaštiti građana.

Takvo stanje vrlo često tjera građane kantona na dalek, mukotrpan i neizvjesan put u Sarajevo. Neki to danas tragikomično nazivaju i „put smrti“.

Uz malo više vizije, suradnje i sloge organa vlasti USK-a, menadžmenta zdravstvenih ustanova i medicinske struke, Bihać može i mora postati grad sa modernom i savremeno opremljenom bolnicom u kojoj je moguće pružiti većinu zdravstvenih usluga za koje danas maltretiramo pacijente i plaćamo visoku životnu i finansijsku cijenu odlaska u Sarajevo ili liječenja u drugim zemljama i zdravstvenim ustanovama. To je potreba građana u Krajini koja se nameće, imajući u vidu geografsku udaljenost USK-a od drugih zdravstvenih ustanova i potrebu pune odgovornosti za zdravlje ljudi u Krajini.

Poražavajuća je činjenica da je ispod 70% građana USK obuhvaćeno osnovnom zdravstvenom zaštitom, što je najmanje u Federaciji, a teža činjenica je da je taj broj osiguranika često površan, paušalan i podešen prvenstveno za dobijanje sredstava iz Fonda i finansiranje domova zdravlja, a nikako nije odraz stvarnog stanja na terenu.

Zdravstvo USK-a, možda više od drugih, opterećeno je vrlo lošim statusom ljekara i zdravstvenih radnika, što je veliki poticaj za izostanak profesionalnijeg odnosa prema pacijentima i za masovnu pojavu mita i korupcije.

Nažalost, mito i korupcija su masovno prisutni u zdravstvu USK-a i postali su uobičajen ritual na relaciji pacijent - zdravstveni radnik. Sistem socijalne zaštite je u osnovi neuređen i neracionalno postavljen i odaje utisak nesigurnog života na ovim prostorima.

Socijalne prinadležnosti su simbolične, a i ono što je sistemski propisano često zbog stanja u budžetu i nemogućnosti finansiranja dolazi u pitanje. Sam sistem socijalne zaštite je neracionalan, jer se neprimjereno velika sredstva, umjesto za socijalne prinadležnosti korisnicima sa socijalnim potrebama, troše za finansiranje glomaznog administrativnog aparata koji „opslužuje“ građane sa socijalnom potrebom. Tako, dok se podmiere zaposleni, onima zbog kojih oni postoje ostaju samo mrvice ili ništa.

Mora se još jednom podsjetiti da i 15 godina nakon rata u Krajini živi populacija građana koje su domaće i međunarodne institucije za praćenje i zaštitu ljudskih prava i sloboda, zbog obespravljenosti, diskriminacije i socijalne nesigurnosti, u svojim izvještajima nazvali

„ljudi izvan zakona“. Radi se o grupaciji građana, stradalnika rata i njihovih porodica iz reda Narodne odbrane koje su aktuelne vlasti u Federaciji „pretvorili“ u civilne žrtve rata, iako se radi o ljudima koji su stradali u uniformama kao pripadnici vojne formacije NO-e.

DNZ BiH je potpuno svjesna ovog stanja i potpuno spremna, ukoliko joj građani USK ukažu povjerenje, da napravi odlučne i snažne korake u pravcu promjene ovog stanja i usmjeravanja u pravcu stvarnih potreba i interesa građana USK-a.

Na putu izgradnje sistema zdravstvene i socijalne zaštite građana primjerenog potrebama čovjeka 21. vijeka i specifičnostima koje nosi geostrateški položaj USK-a, DNZ BiH će svoje aktivnosti u ovoj važnoj oblasti usmjeravati na sljedeće:

Aktuelizirati i podvrgnuti reviziji i dopuni Strategiju razvoja zdravstva i zdravstvene zaštite USK-a, koja je formalno usvojena, ali nikada nije praktično zaživjela, niti je neko od odgovornih pokazivao ozbiljne namjere da je provodi,

Inicirati i zalagati se za donošenje jedinstvene strategije zdravstvene zaštite građana na nivou države, radi racionalnog korištenja resursa u zdravstvu i posebno radi jednake dostupnosti zdravstvene zaštite svim građanima BiH,

Kantonalnu bolnicu Bihac urediti, opremiti i osposobiti u moderan bolnički centar koji može, građanima USK pružati medicinske usluge na nivou bilo kojeg modernog bolničkog centra u Evropi, a usmjeravanja na „put smrti“ svesti samo na rijetku pojavu, a nikako svakodnevicu za građane USK,

U periodu do 2014. godine obezbijediti uslove i mehanizme da svaki građanin USK bude obuhvaćen osnovnom zdravstvenom zaštitom,

Davati podršku i poticati reforme u oblasti zdravstvene zaštite u pravcu njene racionalizacije, poboljšanja uslova rada i liječenja, povećanja odgovornosti za zdravlje građana, poboljšanja statusa zdravstvenih radnika i drugo,

Insistirati da se socijalna zaštita sistemski i institucionalno racionalizira i uredi na nivou države kako bi svaki stanovnik BiH, ma gdje živio, imao ista prava i stepen socijalne zaštite,

Izraditi i sprovesti strategiju za dokidanje ekstremnog siromaštva i za smanjivanje siromaštva uopće,

Davati punu podršku i poduzimati korake na unapređivanju zaštite stradalnika rata i njihovih porodica, invalida, nemoćnih i siromašnih porodica sa djecom,

Insistirati, kod svih domaćih i međunarodnih relevantnih faktora i postići politički konsenzus za konačnu implementaciju Presude Ustavnog suda F BiH o ostvarivanju prava pripadnika NO.



4. PRAVCI I PRIORITETI DJELOVANJA U OBLASTI OBRAZOVANJA

Obrazovanje je zasigurno najprofitabilnija investicija za budućnost svake zajednice.

Nažalost, kao i u mnogim drugim strateškim oblastima u USK-u, ozbiljnim i važnim pitanjem obrazovanja bavili su se ljudi koji nisu došli značaju tog pitanja za napredak i budućnost zajednice.

Osnovno i srednje obrazovanje u USK-u je potpuno zapušteno i čvrsto u kandžama političkih ideologa koji u obrazovanju vide važno ideološko uporište za svoje političke projekte, a ne najvažniju stepenicu u životu mladog čovjeka.

Nacionalni programi, loši uslovi za obavljanje nastave, neprimjerena stručna zastupljenost nastave, politički i ideološki uticaji, devalviranje statusa i ugleda prosvjetnih radnika, slaba primjena savremenih učila i pomagala, otpor reformama obrazovanja, samo su neke od karakteristika poslijeratnog i sadašnjeg osnovnog i srednjeg obrazovanja u USK-u

Bihaćki univerzitet je jedan od rijetkih pozitivnih poteza koje su napravile poslijeratne vlasti u USK-u prilikom njegovog osnivanja. Nažalost, od pozitivnog poteza njegovog osnivanja traje proces njegovog devalviranja i urušavanja na svim poljima, tako da danas objektivno imamo jednu važnu i stratešku obrazovnu instituciju čiji rad i budućnost su iz dana u dan neizvjesniji.

Bihaćki univerzitet je danas opterećen brojnim anomalijama koje nisu primjerene njegovom značaju za Krajinu i akademskom statusu. Neprimjereni uslovi za rad i nastavu profesora i studenata, formiranje fakulteta i upis studenata više se prilagođavaju željama i ambicijama profesora, negoli stvarnim tržišnim potrebama za kadrovima. Korupcija i kriminal na Univerzitetu su izašli iz okvira svake javne kontrole, Univerzitet je postao dom za zbrinjavanje propalih i islužanih političara ili njihova preodgojna ustanova, stručna zastupljenost nastave i kvalitet proizvedenih kadrova su ispod svakog pristojnog standarda, na Univerzitetu je kontinuirano prisutna borba političkih uticaja, devalviranje nastavnog i naučnog rada i sl., samo su neke od karakteristika sadašnjeg stanja na Bihaćkom univerzitetu.

Danas u vrijeme „Bolonjskog procesa“ Evropa želi sistem obrazovanja svih zemalja EU, i potencijalnih članova učiniti kompatibilnim i validnim u bilo kojoj od tih zemalja. To je priprema za budućnost i kretanje kadrova bez dodatnih ispita i nostrifikacija diploma.

Bihaćki univerzitet odavno ne ide u pravcu koji nameće Bolonjski proces i postoji velika opasnost da takvo ponašanje rezultira velikim rizikom i neizvjesnošću pred buduće certificiranje od strane Bolonjske komisije. Za ovakvu poziciju Bihaćkog univerziteta odgovornost snosi poslijeratna vlast u USK-u koja je ovu Ustanovu, kao i obrazovanje uopće, stavila na margine javne podrške i značaja.

Rezultat ovakvog odnosa prema visokom obrazovanju i rezultat stanja u Bihaćkom univerzitetu je intenzivno javno devalviranje stečenih diploma i kako je počelo ne bi bilo ništa neobično da se u natječajima za posao kao jedan od uslova pojavi i klauzula „pod uslovom da diplomu nije stekao na Univerzitetu u Bihaću“.

Dakle, jasno je svakome, umjesto strukom i sticanjem znanja, obrazovanje USK je opterećeno podjelama, vjerskom, vojnom i političkom ikonografijom, nepostojanjem elementarnih uslova za normalan rad, devalviranjem nastavnog i naučnog rada, korupcijom, itd.

Kuda vodi takav sistem obrazovanja??? Kome takvi „proizvodi“ trebaju???

Ovo su racionalna pitanja koja sve češće javno postavlja svaki dobronamjeran Krajišnik i intelektualac koji rezonuje značaj visokog obrazovanja i standarde koji se nameću pred njega.

Sve ovo govori da je sveobuhvatna reforma obrazovanja nužna i USK ne smije dopustiti njeno odlaganje, ukoliko želi uhvatiti korak za evropskim prioritetima u obrazovanju.

DNZ BiH je svjesna značaja obrazovanja za razvoj i napredak zajednice, a posebno je svjesna značaja Bihaćkog univerziteta za mlade ljude u Krajini i stoga će na ovom pitanju intenzivirati svoje aktivnosti na sljedeće:

Izraditi Strategiju razvoja obrazovanja USK u kojoj će posebno razraditi svaki segment obrazovanja, od predškolskog do sticanja naučnih zvanja,

Izvršiti reformu obrazovanja sa uvođenjem evropskih standarda na svim nivoima obrazovanja,

Omogućiti besplatno i obavezno osnovno i srednje obrazovanje za sve stanovnike USK, u uslovima približnim EU, po svim relevantnim mjerilima,

Poticati visoko obrazovanje i poduzimati korake da isto bude dostupno svim mladim ljudima putem dodjeljivanja studentskih stipendija za sve redovne studente u USK-u i kadrovskih stipendija za deficitarna zanimanja, po uzoru kako smo to organizirali u Velikoj Kladaši, gdje DNZ BiH obnaša vlast,

Stvarati uslove za poboljšanje uslova za obavljanje nastave i na poboljšanju studentskog standarda i statusa prosvjetnih radnika,

Napraviti analizu dosadašnjeg rada Univerziteta u Bihaću, razraditi i usvojiti strategiju razvoja i obezbijediti sve pretpostavke da Univerzitet u Bihaću bude jak, moderan, uspješan, održiv i u evropskim okvirima priznat i respektabilan univerzitet,

Osigurati koordinaciju svih relevantnih faktora za razmjenu mišljenja i ideja, za kvalitetno organizovanje, planiranje i izvođenje nastavnog procesa, uključivo i planiranje potrebnih zanimanja u skladu sa potrebama USK, tržišta rada i šire,

Raspodijeliti teret sa općinama u segmentu prijevoza i knjiga za učenike osnovnih i srednjih škola vođeni principom da nijedno dijete USK zbog tih, materijalnih razloga, ne smije prekinuti, niti odustati od svog školovanja,

Inicirati i normativno regulisati kontrolu reviziju stečenih akademskih i naučnih zvanja za sve javne radnike i uposlenike koji primaju plaću i finansiraju se iz budžeta USK-a.



5. PRAVCI I PRIORITETI DJELOVANJA U OBLASTI PRAVOSUĐA, SIGURNOSTI I JAVNOG SEKTORA

Iako zvanično depolitizirani, javna je tajna da su ovi organi i dalje, dobrim dijelom, produžena ruka političkih lobija i njihovih protagonista.

Na uvezanost kriminalaca, vlasti, sudova i organa gonjenja u USK-u ukazuje i većina sudskih postupaka istaknutim političarima ili kriminalcima vladajuće oligarhije, od rata do danas.

Broj neriješenih predmeta ne samo da ometa i sprečava „dolazak pravde i zakona“ na ove prostore, već predstavlja veliki rizik za budžete općina i budžet USK.

Policija je, još opterećena lošim materijalnim statusom policajaca i policijskih službenika, nedovoljnom i neadekvatnom opremom, događajima iz rata, kadrovima sumnjivih stručnih i moralnih kvaliteta, političkim uticajima, vezama sa podzemljem ...

U praksi još živi i obavještajni paralelizam između zvaničnih državnih službi i AID-a, kao stranačke i nacionalne obavještajne službe.

BiH, pa i kanton su višestruko prekriveni (pored brojnih domaćih, kako zvaničnih, tako i stranačkih) stranim obavještajnim službama, pa se stiče dojam da se više i ne zna ko i za koga radi.

Javni sektor, pored „bolovanja od istih bolesti“ kao i državni aparat u USK-u, predstavlja i „državu u državi“.

To su ustanove za poslušne i one koji su „lake ruke“ kada je u pitanju zavlacenje iste u javni – narodni novac. Bitno je postati „dio kola“ i svi problemi su riješeni. Ovo stanje je nedopustivo i neodrživo, jer sve njihove greške, njihovu nesposobnost i kriminal, sve to plaćaju poreski obveznici i građani USK-a.

Dokle i zašto?

Naravno, ovdje je mogućnost da se stvari promijene limitirana stepenom političkog uticaja DNZ BiH i činjenicom da je najveći dio

nadležnosti u ovim oblastima regulisan federalnim zakonima i propisima. Značajniji uticaj na promjenu stanja može se ostvariti pod uslovom da DNZ BiH bude vodeći politički faktor i nosilac vlasti u USK-u, te da na višim nivoima vlasti bude učesnik u parlamentarnoj većini i novoj vlasti.

Pravosuđe, policija i javni sektor su stubovi vlasti i u našim uslovima ti stubovi su do kraja ruinirani slabostima koje prijete urušavanjem kompletnog sistema.

Ukoliko na predstojećim izborima u BiH dobije povjerenje građana, DNZ BiH će značajan dio svojih aktivnosti usmjeriti na promjenu stanja u ovim oblastima, a naročito na slijedeće:

Poduzimati sve radnje na potpunom depoliziranju policije i pravosuđa, osloboditi ga zagrljaja politike i organiziranog kriminala, ali i insistirati na stručnosti, profesionalizmu i punoj odgovornosti za stanje u ovim oblastima i za bilo koje (i čije) propuste koji devalviraju pravnu državu, ili krše neka od elementarnih ljudskih prava.

Osigurati bolji materijalni položaj i bolju opremljenost policije i policijskih službenika i raditi na povećanju povjerenja građana u stručnost i nepristrasnost ovih organa.

Podržati formiranje i ustroj policije na nivou države BiH kako bismo dobili na kvaliteti, smanjili cijenu i osigurali isti tretman svakog građanina u bilo kojem dijelu BiH.

Osigurati transparentnost rada javnih ustanova i potpuno promijeniti njihov odnos prema građanima USK. Umjesto sadašnjeg ponašanja kao političkih sponzora, vladara i monopolista, oni se moraju ponašati kao servis građana koje građani i previše skupo plaćaju za obavljanje usluga od javnog interesa.

Spriječiti sve opstrukcije i kršenja ljudskih prava prema povratnicima, i to bez obzira na mjesto, naciju, spol ili dob povratnika, te stalno raditi na poboljšanju uslova njihovog življenja i ekonomske održivosti.

Insistirati na primjerenom nacionalnoj i manjinskoj zastupljenosti u javnom sektoru, kao temeljnom uslovu za vraćanje povjerenja i za procese potpune normalizacije života na ovim prostorima.

Istrajavati na smanjenju izdataka budžeta za finansiranje javne potrošnje i njeno svođenje u razumne okvire, a u korist poticajnog i razvojnog djelovanja budžeta.

Donijeti strategiju o razvoju sporta i kulture u USK-u, kao osnovnih potreba čovjeka i zajednice, posebno mladih ljudi.

Izvršiti prestrukturiranje i racionalizaciju kantonalnih institucija, te brzu reformu državne administracije i javnog sektora radi smanjivanja izdataka za njihovo funkcionisanje, osiguranja njihove efikasnosti i povećanja odgovornosti za svoj rad.



Kada smo radili našu izbornu Platformu za Izbore u USK-u prije četiri godine nismo ni slutili da će i nakon četiri godine stanje u USK-u biti identično, čak u nekim segmentima značajno lošije i da će naša platforma biti toliko aktuelna danas da su joj za predstojeće Izbore 03. oktobra potrebni samo mali zahvati. Ovo iz razloga što je aktuelna vlast u protekle četiri godine uradila tako malo da to nije vrijedno mjerenja i pomena.

Na predstojeće Izbore, 03. oktobra, DNZ BiH izlazi sa sada jasno i glasno potcrtanim sloganom **Vrijeme je...** Ova poruka je toliko jasna da i nema neke velike potrebe za njeno obrazlaganje i elaboriranje.

Za čitaoce ove platforme želimo navesti nekoliko segmenata u kojima bi umjesto poruke **Vrijeme je...** bila primjerenija poruka **Krajnje je vrijeme...**, kako bi bolje i ozbiljnije bili shvaćeni i kako bi građani-birači u USK-u bili potaknuti da 03. oktobra naprave korak i obezbijede promjenu stanja u USK-u za koje niko ne može naći lijepu riječ i opravdanje.

Vrijeme je da se suočimo sa sumornom istinom da je USK, od nekad najperspektivnijeg kantona i regije u Federaciji BiH, po svim važnijim parametrima ekonomskog i društvenog razvoja doveden na dno Federacije.

Vrijeme je da smjestimo na političku deponiju one koji su nam obećavali zlatne kašike, a 15 godina nas bezobzirno obmanjivali, pljačkali, siromašili, ponižavali i sramotili.

Vrijeme je da znamo ko je i zašto opljačkao i uništio krajiške potencijale i resurse u Agrokomercu, Kombiteksu, Polietilenci, Žitopreradi, Medici, Šipadu i drugim, nekadašnjim nosiocima razvoja Krajine.

Vrijeme je da znamo ko i zašto uporno zaključava zapadnu kapiju Bosne i Hercegovine u Evropu i svijet.

Vrijeme je da znamo istinu o predratnim, ratnim i poratnim događanjima u Krajini, kako bi Krajišnici pružili ruku jedan drugome i ponovo rame uz rame zajedno gradili svoju budućnost.

Vrijeme je da policija i pravosuđe u USK-u iz ladica i fioka izvade i procesuiraju brojne predmete lopovluka i kriminala koje godinama pod prijetnjama i ucjenama zataškavaju.

Vrijeme je da znamo ko je Bihačkoj regiji u regionalizaciji BiH namijenio ulogu kusura u podjeli interesnih sfera između nacionalnih interesnih grupa i političkih lobija u BiH.

Vrijeme je da Krajina, USK, Bihačka regija... od viših nivoa vlasti u Sarajevu bude ravnopravno tretirana i uvažavana, kao druge administrativne jedinice i regije u BiH.

Vrijeme je da 03. oktobra ukažete povjerenje kandidatima DNZ BiH i naprednim demokratskim snagama u USK-u da formiraju odgovornu vlast i Krajini vrate dostojanstvo i mjesto koje mu po njegovim resursima i potencijalima pripada.

Vrijeme je da 03. oktobra glasate za DNZ BiH i njene kandidate i da Vi i Vaša djeca živite život kakav želite i zaslužujete.



GLASAJTE ZA NAS



www.dnzbih.ba